

„Edukacija za voditelja psihosocijalnog tretmana počinitelja rodno zasnovanog nasilja, odnosno nasilja u porodici“

Stručna edukacija za 7 odabranih zdravstvenih radnika i saradnika – uposlenika centara za mentalno zdravlje u zajednici na području Federacije Bosne i Hercegovine, pod nazivom „Edukacija za voditelja psihosocijalnog tretmana počinitelja rodno zasnovanog nasilja, odnosno nasilja u porodici“ počela je 16.09.2021. godine u Neumu.

Edukacija će se realizirati kroz četiri modula u trajanju po tri dana, i to na osnovu dokumenta „Psihosocijalni tretman počinitelja rodno zasnovanog nasilja – Modul za obuku“, koji je razvijen od strane Federalnog ministarstva zdravstva i Populacijskog fonda Ujedinjenih nacija (UNFPA), Ured za Bosnu i Hercegovinu.

Cilj ove obuke je:

- Educiranje profesionalaca za vođenje psihosocijalnog tretmana počinitelja nasilja,
- Senzibilizacija i osnaživanje profesionalaca za rad sa počiniteljima nasilja,
- Jačanje profesionalne saradnje stručnjaka različitih stručnih profila,
- Razmjena znanja i vještina profesionalaca,
- Osposobljavanje profesionalaca za provođenje zaštitne mjere obaveznog psihosocijalnog tretmana počinitelja nasilja.

Na temelju Sporazuma o provedbi Projekta “Jačanje kapaciteta institucija za rješavanje rodno zasnovanog nasilja u Bosni i Hercegovini” zaključenog između Američke agencije za međunarodni razvoj (USAID) i Ministarstva za ljudska prava i izbjeglice Bosne i Hercegovine, Agencija za ravnopravnost spolova Bosne i Hercegovine, Ministarstva za ljudska prava i izbjeglice BiH pruža podršku federalnim vlastima u dijelu jačanja kapaciteta za rad sa počiniteljima nasilja. Aktivnost je izravno povezana i sa realizacijom mjera predviđenih Strategijom za prevenciju i borbu protiv nasilja u porodici u Federaciji Bosne i Hercegovine.

U okviru tog Sporazuma, Federalno ministarstvo zdravstva u saradnji sa Agencijom za ravnopravnost spolova Bosne i Hercegovine, Ministarstva za ljudska prava i izbjeglice BiH provodi aktivnosti na jačanju odgovora profesionalaca u zdravstvu na rodno zasnovano nasilje. Programske aktivnosti odnose se na prilagođavanje sistema zdravstva obavezama koje je Bosna i Hercegovina preuzela potpisivanjem Konvencije Vijeća Evrope o sprječavanju i borbi protiv nasilja nad ženama i nasilja u porodici (tzv. Istanbulska konvencija), ali i obavezama koje proističu iz Zakona o zaštiti od nasilja u porodici („Službene novine Federacije BiH“, broj 20/13).

U tom kontekstu, Agencija za ravnopravnost spolova Bosne i Hercegovine je i podržala stručnu edukaciju uposlenika centara za mentalno zdravlje u zajednici. Također, podršku provedbi edukacije pruža i Gender Centar Federacije BiH.

Naime, Zakonom o zaštiti od nasilja u porodici („Službene novine Federacije BiH“, broj 20/13) je propisano da nasilje u porodici postoji ukoliko postoji osnov sumnje da su učinjene radnje, kojim član porodice nanosi fizičku, psihičku ili seksualnu bol ili patnju i/ili ekonomsku štetu, kao i prijetnje koje izazivaju strah od fizičkog, psihičkog ili seksualnog nasilja i/ili ekonomske štete kod drugog člana porodice. Zakon definiše sistem za zaštitu žrtava, ali i obavezu nadležnim tijelima da provode zaštitne mjere koje se izriču počiniteljima nasilja. Svrha zaštitnih mjera je osiguravanje nužne zaštite zdravlja i sigurnosti osoba izloženih nasilju, sprječavanje nasilja u porodici, te poduzimanje efikasnih mjera liječenja i kontrole agresije kod nasilnih osoba. Između ostalog, Zakon utvrđuje zaštitnu mjeru obaveznog psihosocijalnog tretmana počinitelja nasilja u porodici, a koja se provodi u centrima za mentalno zdravlje u zajednici koji su organizirani u okviru domova zdravlja.

Na osnovu Zakona donesen je Pravilnik o načinu i mjestu provedbe zaštitne mjere obaveznog psihosocijalnog tretmana počinitelja nasilja u porodici ("Službene novine Federacije BiH", broj 63/17).

Da bi se zaštitna mjera obaveznog psihosocijalnog tretmana počinitelja nasilja u porodici uspješno provodila, uposleni u zdravstvenim ustanovama treba da imaju posebne edukacije/obuke, jer rad sa počiniteljima nasilja zahtjeva specifična stručna znanja i vještine.

Edukaciji koju organizira Federalno ministarstvo zdravstva u periodu od septembra do decembra 2021. godine pristupilo je sedam polaznika nominiranih u ime domova zdravlja sa područja Federacije BiH, odnosno centara za mentalno zdravlje u zajednici. Polaznicima će po okončanju edukacije biti dodijeljeni certifikati, kao dokaz o sticanju znanja i vještina za voditelja psihosocijalnog tretmana počinitelja rodno zasnovanog nasilja, odnosno nasilja u porodici.